

Segun abogado Flanegin,

Dependiendo riba con e caso lo bay, Minister Wever por haya un castigo penal

ORANJESTAD(AAN): Diabierna corte superior a dicta cu tin base pa ordena Ministerio Publico cuminsa un investigacion contra Minister Booshi Wever, pa e expresionnan cu el a hasi contra Parlamentario Rudy Lampe na 2007.

Lampe a yama un conferencia di prensa y durante e conferencia di prensa su abogado Ameline Flanegin a duna un splicacion riba e caso entre Lampe y Wever.

Segun Mr. Flanegin, ta asina cu na December 2007 Lampe a entrega un keho na O.M cu su pruebanan di loke Wever lo bisa e tempo ey na December 2007, cu por wordo considera como un ofensa serio, of por ehempel hasi un persona sospechoso den un forma ofensivo.

Esey a sosode door di Minister Wever, door di publicacionnan den corant, entrevistanan cu a wordo duna y un remetido di Ministerio di Wever.

Esey a wordo hasi na December 2007 y un tempo a pasa sin cu Lampe a tende algo di parti di Ministerio Publico, riba con a para cu e keho entrega.

Lampe a bay oficina di Flanegin na Januari 2009 y a puntra kico lo por wordo hasi. E abogado a bisa cu ta bon pa manda prome un carta pa O.M pa puntra kico a pasa cu e keho, pasobra quizas nan ta hasiendo e investigacion y nan no a informa Lampe.

E carta a wordo manda pa O.M pero no a tende nada. Despues Lampe a bisa e abogado pa sigui cu e proceso y a dicidi di manda un keho por escrito ('klaagschrift') na Hof.

Ora bo entrega un keho contra un persona y bo no tende nada, bo por scoge e caminda ey di entrega un keho na hof y hof lo bay wak si tin motibo pa duna un orden pa persigui e persona.

E 'klaagschrift' a wordo entrega na April 2009 y na Mei 2009 O.M a manda un carta pa Lampe y su abogado bisando cu nan a ricibi e klaagschrift, pero cu Landsrecherche tabata hopi druk y door di esaki, ta e momento ey por cuminsa hasi e investigacion.

Mientrastanto Lampe a haya tende di hof cu e caso lo wordo trata 15 di Juni.

Durante tratamento di e caso, Lampe y su abogado a ricibi e

procesverbal cu landsrecherche a traha di e caso.

Dia 15 hof a bisa cu dia 16 lo sigui cu tratamento.

P.G Pieters tabata presente representando O.M y hof.

P.G e ora ey a bisa cu O.M ta haya cu no tin base pa por persigui Minister Wever, pa e expresionnan cu el a hasi den direccion di Lampe, pasobra e no a yama Lampe pa pedofiel literalmente.

Ademas P.G no a haya cu tabata oportuno na e momento ey pa persigui Wever.

Hof a dicidi cu ta cera e tratamento y dia 30 di Juni a haya un asina yama 'tussenbeschikking' cu ta bisa cu nan kier scucha Wever.

Esey a tuma lugar dia 18 di Augustus, unda cu Wever y Lampe a presenta.

E Minister a wordo scucha y a wordo duna e oportunidad di duna su remarkenan di e caso. Diabierna pues a yama pa wak con a para y a logra haya e sentencia for di Corsow.

Segun abogado Flanegin, e sentencia ta hopi interesante pasobra den e sentencia ta wordo bisa claramente door di hof, cu loke Lampe a trece dilanti cu Wever a bisa contra dje, dependiendo di con e investigacion lo bay na e caso cu ta bay tin y tambe dependiendo di loke Wever ta bay trece dilanti, esaki por conduci na un sentencia unda Wever lo haya un castigo.

Esey ta a base di loke hof ta wak den e procesverbal.

Pesey hof no ta wak motibo pa negligencia e keho entrega pa Lampe, cu ta pidi pa persigui



Wever penalmente.

E sentencia di hof ta bisa tambe cu e ta haya cu Lampe su bon nomber y honor por a wordo causa daño y pesey nan ta haya cu no por bisa cu no ta oportuno pa bin cu un caso.

A base di e sentencia aki O.M tin cu bay traha un citacion ('dagvaarding'), na unda cu

Wever lo pro wordo yama como sospechoso dilanti di corte, a base di e hechonan treci dilanti y asina e lo por wordo sentencia.

DIARIO a puntra cuanto un caso asina por dura pa bin dilanti y Flanegin a splica cu no mester tarda y cu e ta kere cu e aña aki ainda e caso lo por tuma lugar.